



*A L'INVICTISSIME,
TRES-PVISSANT, ET
tres-chrestien Henry Roy de France
second; Michel Nostradamus son
tres humble, tres-obeissant serui-
teur & subiect, victoire & felicité.*

P OVR icelle souueraine obserua-
tion que i'ay eu, ô tres-chrestien
& tres victorieux Roy, depuis que
ma face estant long temps obnubi-
lee se presente au deuant de la deité
de vostre maiesté immesuree, depuis en ça i'ay
esté perpetuellement esblouy, ne desistant de
honnorer & dignement venerer iceluy iour que
premierement deuant icelle ie me presentay,
comme à vne singuliere maiesté tant humaine.
Or cherchant quelque occasion par laquelle ie
peusse manifester le bon cœur & franc courage
que moyennant iceluy mon pouuoir eusse fait
ample extension de cognoissance enuers vostre
serenissime maiesté. Or voyant que par effects
le declairer ne m'estoit possible, ioint avec mon
singulier desir de ma tant longue obtenebration
& obscurité, estre subitement esclaire & trans-

4
portee au deuant de la face du ſouuerain œil, & du premier monarque de l'vniuers, tellement que i'ay eſté en doute longuement à qui ie viendrois conſacrer ces trois Centuries du reſtant de mes Propheties, paracheuant la miliade, & apres auoir eu longuement cogité d'une temeraire audace ay prins mon addreſſe enuers voſtre maieſté, n'eſtant pour cela eſtonné, comme raconte le grauiffime aucteur Plutarque en la vie de Lycurgue, que voyant les offres & preſens qu'on faisoit par ſacrifices aux temples des dieux immortels d'iceluy temps, & à celle fin que l'on ne ſ'eſtonnaſt par trop ſouuent deſdictes fraiz & miſes ne ſ'oſoyent preſenter aux temples. Ce nonobſtant voyant voſtre ſplendeur Royale, accompagnée d'une incomparable humanité ay prins mon addreſſe, non comme aux Rois de Perſe, qu'il n'eſtoit nullement permis d'aller à eux, ny moins ſ'en approcher. Mais à vn reſ- prudent, à vn treſſage Prince i'ay conſacré mes nocturnes & prophetiques ſupputations, compoſées pluſtoſt d'un naturel inſtinct, accompagné d'une fureur poëtique, que par reigle de poëſie, & la plus part compoſé & accordé à la calculation Aſtronomique, correſpondant aux ans, mois & ſepmaines des regions, contrées, & de la pluſpart des villes. & citez de toute l'Europe, comprenant de l'Aſſrique, & vne partie de l'Aſie par le changemēt des regions, qui ſ'appro- chent la plus part de tous ces climats, & compoſé
d'vnt

d'une naturelle faction : respondra quelqu'un qui auroit biẽ besoin de soy moucher, la rithme estre autant facile, comme l'intelligence du sens est difficile. Et pource, ô tres-humanissime Roy, la plus part des quatrains prophetiques sont tellement scabreux . que l'on n'y scauroit donner voye ny moins aucuns interpreter, toutesfois esperant de laisser par escrit les ans, villes, citez, regions où la plus part aduiendra, mesmes de l'annee 1585. & de l'annee 1606. accommẽçant depuis le temps present, qui est le 14. de Mars, 1557. & passant outre bien loing iusques à l'aduenement qui sera apres au commencement du septiesme millenaire profondement supputé, tãt que mon calcul astronomique & autre scauoir s'a peu estẽdre, où les aduersaires de Iesus Christ & de son eglise, commenceront plus fort de pululer, le tout a esté composé & calculé en iours & heures d'election & bien disposees, & le plus iustemẽt qu'il m'a esté possible. Et le tout Minerua libera & non inuita, supputant presque autant des aduentures du temps aduenir, comme des eages passez, comprenãt de present, & de ce que par le cours du temps par toutes regiõs l'on cognoistra aduenir tout ainsi nommement comme il est escrit, n'y mellant rien de superflu, combien que l'on die: Quod de futuris non est determinata omnino veritas. Il est bien vray, Sire, que pour mon naturel instinct qui m'a esté donné par mes auites ne cuidant presager, & presager,

adioustant & accordant iceluy naturel instinct avec' ma longue supputation vny, & vuidant l'ame, l'esprit, & le courage toute cure, sollicitude, & facherie par repos & tranquillité de l'esprit. Le tout accordé & presagé l'vne partie tripode æneo. Combien qu'ils sont plusieurs qui m'attribuent ce qu'est autant à moy, comme de ce que n'en est rien, Dieu seul eternal, qui est prescruteur des humains courages pie, iuste. & misericordieux, en est le vray iuge, auquel ie prie qu'il me vueille defendre de la calumnie des meschants, qui voudroyent aussi calumnieusement s'enquerir pour quelle cause tous vos antiquissimes progeniteurs Rois de France ont guery des escrouelles, & des autres nations ont guery de la morsure des serpens, les autres ont eu certain instinct de l'art diuinatrice, & d'autres cas qui seroyent long icy à racompter. Ce nonobstant ceux à qui la malignité de l'esprit malin ne sera comprins par le cours du temps apres la terrene mienne extinction, plus sera mon escrit qu'à mon viuant, ce pendant si à ma supputation des ages ie faillois ou ne pourroit estre selon la volonté d'aucuns. Plaira à vostre plus qu'imperialle maiesté me pardonner, protestant deuant Dieu & ses Saints, que ie ne pretends de mettre rien quelconques par escrit en la presente epistre, qui soit contre la vraye foy Catholique, conferant les calculations Astronomiques, iouxte mon seauoir: car l'espace de temps de nos premiers,

qui

qui nous ont precedez sont tels , me remettant
 sous la correction du plus sain iugement , que
 le premier homme Adam fut deuant Noë enui-
 ron mille deux cens quarante deux ans, ne com-
 putant les temps par la supputation des Gentils,
 comme a mis par escrit Varron : mais tant seu-
 lement selon les sacrees Escriptions , & selon la
 foiblesse de mon esprit , en mes calculations
 Astronomiques. Apres Noë , de luy & de l'uni-
 uersel deluge, vint Abraham enuiron mille hui-
 ctante ans , lequel a esté souuerain Astrologue,
 selon aucuns , il inuenta premier les lettres Cal-
 deiques : apres vint Moysse enuiron cinq cens
 quinze ou seize ans , & entre le temps de Dauid
 à Moysse, ont esté cinq cens septante ans, là enui-
 ron. Puis apres entre le temps de Dauid , & le
 temps de nostre sauueur & redempteur Iesus
 Christ , nay de l'vnique vierge , ont esté (selon
 aucuns Cronographes) mille trois cens cinquãte
 ans : pourra obiecter quelqu'vn ceste supputatiõ
 n'estre veritable , pource qu'elle differe à celle
 d'Eusebe. Et depuis le temps de l'humaine re-
 demption iusques à la seduction detestable des
 Sarrazins, s'ont esté six cens vingt & vn an, là en-
 uiron, depuis en çà l'on peut facilement colliger
 quels temps sont passez, si la miene supputation
 n'est bonne & valable par toutes nations, pource
 que le tout a esté calculé par le cours celeste, par
 association d'esmotion infuse à certaines heures
 delaissees, par l'esmotion de mes antiques pro-

geniteurs : Mais l'iniure du temps, ô serenissime Roy , requiert que tels secrets euenemens ne soye nt manifestez , que par ænigmatique sentence, n'ayant qu'vn seul sens , & vni que intelligence , sans y auoir rien mis d'ambigue n'amphibologique calculation : mais plustost sous obnubilee obscurité par vne naturelle infusion approchant à la sentence d'vn des mille & deux Prophetes, qui ont esté depuis la creation du monde, iouxte la supputation & Chronique punique de Ioel, Effundam spiritum meum super omnem carnem & prophetabunt filij vestri, & filia vestra. Mais telle prophetie procedoit de la bouche du saint Esprit , qui estoit la souveraine puissance eternelle, adioincte avec la celeste à d'aucuns de ce nombre ont predict de grandes & esmerueillables aduentures : Moy en cest endroiect ie ne m'attribue nullement tel tiltre. Ia à Dieu ne plaise , ie confesse bien que le tout vient de Dieu, & luy en rends graces, honneur, & loüange immortelle , sans y auoir meslé de la diuination que prouient à fato : mais à Deo , à natura , & la pluspart accompagnée du mouvement du cours celeste , tellement que voyant comme dans vn miroüier ardent , comme par vision obnubilee, les grands euenemens, tristes prodigieux , & calamiteuses aduentures qui s'approcheet par les principaux culteurs. Premierement des temples de Dieu , secondement par ceux qui sont terrestrement soustenus s'ap-
procher

procher telle decadence, avecques mille autres calamiteuses aduentures, que par le cours du tēps on cognoistra aduenir: car Dieu regardera la longue sterilité de la grand dame, que puis apres conceura deux enfans principaux: mais elle periclitant, celle qui luy sera adioustee par la temerité de l'aage de mort periclitant dedans le dixhuitiesme, ne pouuant passer le trentesixiesme qu'en delaislera trois males, & vne femelle, & en aura deux, celuy qui n'en eut iamais d'un mesme pere, des trois freres seront telles differences, puis vnies & accordees, que les trois & quatre parties de l'Europe trembleront: par le moindre d'aage sera la monarchie Chrestienne soustenue, augmentee: sectes esleuees, & subitement abaissées, Arabes reculez. Royaumes vnis, nouuelles Loix promulguees: des autres enfans le premier occupera les Lions furieux coronnez, tenants les pattes dessus les armets intrepidez. Le second se profundera si auant par les Latins accompaigné que sera faicte la seconde voye tremblante & furibonde au mont Iouis descendant pour monter aux Pyrennees, ne sera translatee à l'antique monarchie, sera faicte la troisieme inondation de sang humain, ne se trouuera de long temps Mars en careme. Et sera donnee la fille par la conseruation de l'Eglise Chrestienne, tombant son dominateur à la paganisme secte des nouveaux infideles, elle aura deux enfans, l'un de fidelité, & l'autre d'infide-

lité par la confirmation de l'eglise catholique. Et l'autre qui à sa grande confusion & tarde repentance la voudra ruiner, seront trois regions par l'extreme difference des ligues c'est assavoir la Romanie, la Germanie, l'Espagne, qui feront diuerses sectes par main militaire, delaisant le 50. & 52. degrez de hauteur, & ferōt tous hōmaige des religions loingtains aux regions de l'Europe de Sept n̄ion de 48. degrez d'hauteur, qui premier par vaincra ne timiditẽ tremblera, puis les plus occidentaux, meridionaux & orientaux trembleront, telle sera leur puissance, que ce qui se fera par concorde & vnion insuperable des conquestes belliques. De nature seront esgaux: mais grandement differentz de foy. Apres cecy la dame sterile de plus grande puissance que la seconde sera receuẽ par deux peuples, par le premier obstinẽ par celuy qui a eu puissance sur tous, par le deuxiesme & par le tiers qui estẽdra ses forces vers le circuit de l'Orient de l'Europe aux paunons l'a proffigẽ & succombẽ & par voye marine fera ses extensions à la Trinacrie Adriatique par Mirmidons & Germaniques du tout succombẽ, & sera la secte Barbarique du tout des Latins grandement affligẽe & deschassẽe. Puis le grand empyre de l'Antechrist commencera dans la Atila & Zerses descendre en nombre grand & innombrable, tellement que la venue du saint Esprit procedant du 48. degrez fera transmigration, deschassant à l'abominatiõ

mination de l'Antechrist, faisant guerre contre
 le royal qui sera le grād vicaire de Iesus Christ,
 & contre son eglise, & son regne per tempus, &
 in occasione temporis, & precedera deuant vne
 eclipse solaire le plus obscur, & le plus tene-
 breux, que soit esté depuis la creation du mon-
 de iusques à la mort & passion de Iesus Christ,
 & de la iusques icy & sera au moys d'Octobre
 que quelque grande translation sera faite, &
 telle que, lon cuydera la pesanteur de la terre
 auoir perdu son naturel mouuement, & estre
 abismee en perpetuelles tenebres, seront pre-
 cedans au temps vernal & s'en ensuyuant apres
 d'extremes changemens, permutations de re-
 gnes, par grands tremblemens de terre, avec
 pullulation de la nefue Babylonne fille mise-
 rable augmentee par l'abomination du pre-
 mier holocauste, & ne tiendra tant seule-
 ment que septante trois ans, sept moys, puis
 apres en sortira du tige . celle qui auoit demeu-
 ré tant long temps sterile procedant du cin-
 quantiesme degré qui renouellera toute l'e-
 glise Chrestienne. Et sera faicte grande paix
 vnion & concorde entre vng des enfans des
 frons esgarez & separez par diuers regnes,
 & sera faicte telle paix que demeurera attaché
 au plus profond baratre le susciteur & pro-
 moteur de la martialle faction par la diuersité
 des religieux & sera vny le Royaume du Ra-
 bieux qui contrefera le sage. Et les contrees,
 villes,

villes, citez, regnes, & prouinces qui auront de-
 laissé les premieres voyes pour se deliurer se ca-
 ptiuant plus profondement seront secrettement
 fachez de leur liberté, & parfaicte religion per-
 due, commenceront de frapper dans la partie
 gauche, pour tourner à la dextre, & remettant la
 saincteté profligee de long tēps avec leur pristin
 escrit, qu'après le grād chien sortira le plus gros
 mastin, qui fera deltruction de tout, mesmes de
 ce qu'au parauant sera esté perpetré, seront re-
 dressiez les temples comme au premier temps, &
 sera restitué le clerc à son pristin estat, & com-
 mēcera à meretricquer & luxurier, faire & com-
 mettre mille forfaitts. Et estant proche d'vne
 autre desolation, par lors qu'elle sera à sa plus
 haute & sublime dignité se dresseront de poten-
 rats & mains militaires, & luy seront oſtez les
 deux glaiues, & ne luy demeurera que les ensei-
 gnes, desquelles par moyen de la curuature qui
 les attire, le peuple le faisant aller droict, & ne
 voulant se condescendre à eux par le bout op-
 posite de la main aygu touchant terre voudront
 stimuler iusques à ce que naistra d'vn rameau
 de la sterile, de long temps, qui deliurera le peu-
 ple vniuers de celle seruitude benigae & volon-
 taire, soy remettant à la protection de Mars, spo-
 liant Iupiter de tous ses honneurs & dignitez,
 pour la cité libre, constituee & assise dans vne
 autre exigue mezopotamie. Et sera le chef &
 gouuerneur iecté du milieu, & mis au haut lieu
 de

de l'ayr ignorant la conspiration des coniu-
 rateurs, avec le second trasibulus, qui de long réps
 aura manié tout cecy, alors les immunditez,
 les abominations seront par grande honte obie-
 ctées & manifestées aux tenebres de la lumiere
 obtenebre, cessera deuers la fin du changement
 de son regne, & les chefs de l'Eglise seront en
 arriere de l'amour de Dieu, & plusieurs d'entre
 eux apostateront de la vraye foy, & des trois se-
 ctes, celle du milieu, par les culteurs d'icelle sera
 vn peu mis en decadence. La prime totalement
 par l'Europe, la plus part de l'Affrique extermi-
 née de la tierce, moyennant les pauures d'esprit,
 que par insésez esleuez par la luxure libidineuse
 adultereront. La plebe se leuera soustenant, de-
 chassera les adherans des legislateurs, & sem-
 blera que les regnes affoiblis par les Orientaux
 que Dieu le createur aye deslié satan des prisons
 infernales, pour faire naistre le grand Dog &
 Dogam, lesquels feront si grande fraction
 abominable aux Eglises, que les rouges ne les
 blancs sans yeux ne sans mains plus n'en iuge-
 ront. Et leur sera ostée leur puissance alors sera
 faicte plus de persecution aux Eglises, que ne
 fut iamais, & sur ces entrefaictes naistra la pe-
 stilence si grande, que des trois pars du monde
 plus que les deux de faudront. Tellement qu'on
 ne se scaura ne cognoistra les appartenans des
 champs & maisons, & naistra l'herbe par les
 aues des citez plus haute que les genoux. Et

au clergé sera faicte totale desolation, & vsurperont les Martiaulx ce que sera retourné de la cité du Soleil de Melite & des isles Stechades, & sera ouuerte la grâde cheyne du port qui prend sa denomination au beuf marin. Et sera faite nouvelle incurfiõ par les maritimes plages, volant le fault Castulum deliurer de la premiere reprise Mahumerane. Et ne seront du tout leurs assaillemens vains, & au lieu que iadis fut l'habitation de Abraham, sera assaillie par personnes qui auront en veneration les Iouialistes. Et icelle cité de Achem sera environnee & assaillie de toutes parts en tresgrande puissance de gens d'armes. Seront affoiblies leurs forces maritimes par les occidentaulx, & à ce regne sera faicte grande desolation, & les plus grandes citez seront depeuplees, & ceux qui entreront dedans, seront comprins à la vengeance de l'yre de Dieu. Et demeurera le sepulchre de tant grande veneration par l'espace de long temps soubz le serain à l'vniuerselle vision des yeulx du ciel du Soleil, & de la Lune, & sera conuertý le lieu sacré en ebergement de troupeau menu & grand, & adapté en substances prophanes. O quelle calamiteuse affliction sera par lors aux femmes enceintes, & sera par lors du principal chef oriental la plus part esmeu par les septentrionaulx & occidentaulx vaincu, & mis à mort profligé, & le reste en fuite & ses enfans de plusieurs femmes emprisonnez, &

15

par lors sera accomplie la prophetie du Royal
Prophete, Vt audiret gemitus compeditorum,
vt solueret filios interemptorum, quelle gran-
de oppression que par lors sera faicte sus les prin-
ces & gouuerneurs des royaumes mesmes de
ceux qui seront maritimes & orientaux & leurs
langues entremeslees à grande societé, la langue
des Latins & des Arabes par la cōmunication
punique, & seront tous ces Roys orientaux chas-
sez, proffigez, exterminiez. non du tout par
moyē des forces des Roys d' Aquilon, & par la
proximité de nostre siecle par moyen des trois
vnys secrettement cerchāt la mort & infidies par
embusches l'vn de l'autre, & duera le renou-
uellement du triumvirat sept ans, que la re-
nommee de telle seēte fera son estendue par
l'vniuers & sera soubstenu le sacrifice de la sain-
cte & immaculee hostie, & seront lors les Sei-
gneurs deux en nombre d' Aquilon victorieux,
sur les orientaux, & sera en iceux faict si grand
bruiēt & tumulte bellique, que tout iceluy
orient tremblera de l'efrayeur d'iceux freres
non freres Aquilonaires. Et pource, Sire, que
par ce discours ie metz presque confusement
ces prediētions & quant ce pourra estre & l'ad-
uenement d'iceux, pour le denombrement du
temps que s'ensuit qu'il n'est nullement ou bien
peu conforme au superieur, lequel tant par
voye astronomique que par autre, mesmes
des sacrees escritures, qui ne peuvent faillir
nullement,

nullement, que si ie voulois à vn chacun quadrin mettre le denombrement du temps se pourroit faire : mais à tous ne seroit agréable, ne n oins les interpreter, iusques à ce, sire que vostre maiesté m'aye octroyé ample puissance pour ce faire, pour ne donner cause aux calūniateurs de me mordre. Toutesfois comptans les ans depuis la creation du monde, iusques à la naissance de Noë, sont passez mille cinq cens & six ans, & depuis la naissance de Noë iusques à la parfaicte fabrication de l'arche, approché de l'vniuerselle inondation passerent six cens ans si les dons estoient solaires ou lunaires, ou de dix mixtions. Je tiens ce que les sacrees escriptures tiennent qu'estoyent Solaires. Et à la fin d'iceux six cens ans Noë entra dans l'arche pour estre sauué du deluge, & fut iceluy deluge vniuersel sus la terre, & dura vn an & deux mois. Et depuis la fin du deluge iusques à la natiuité d'Abraham, passa le nombre des ans de deux cens nonante cinq. Et depuis la natiuité d'Abraham iusques à la natiuité d'Isaac, passerent cent ans. Et depuis Isaac iusques à Iacob, soixante ans, dés l'heure qu'il entra dans Egypte, iusques en l'yssue d'iceluy passerent cent trente ans. Et depuis l'entree de Iacob en Egypte iusques à l'yssue d'iceluy passerent quatre cens trente ans. Et depuis l'yssue d'Egypte iusques à la edification du temple faicte par Salomon au quatriesme an de son regne, passerent quatre cens octante ou quatre

17

vingt ans. Et depuis l'edification du temple iusques à Iesus Christ selō la supputation des hierographes passerent quatre cens nonante ans. Et ainsi par ceste supputation que i'ay faicte colligee par les sacrees lettres sont environ quatre mille cent septante trois ans , & huiet moys peu ou moins. Or de Iesuchrist en ça par la diuersité des sectes, ie le laisse, & ayant supputé & calculé les presentes propheties , le tout selon l'ordre de la chayne qui contient la reuolution le tout par doctrine astronomique, & selon mon naturel instinct, & apres quelque temps & dans iceluy comprenant depuis le temps que Saturne qui tournera entrer a sept du moys d'Auril iusques au 25. d'Aoust Iupiter a 14. de Iuin iusques au 7. d'Octobre, Mars depuis le 17. d'Auril iusques au 22. de Iuing, Venus depuis le 9. d'Auril, iusques au 22. de May, Mercure depuis le 3. de Feurier, iusques au 27. dudit. En apres du premier de Iuing iusques au 24. dudit & du 25. de Septembre iusques au 16. d'Octobre, Saturne en Capricorne, Iupiter en Aquarius, Mars en Scorpio, Venus en Pisces, Mercure dans vn moys en Capricorne, Aquarius & Pisces, la lune en Aquarius, la teste du dragon en Libra : la queue a son signe opposite suyuant vne conionction de Iupiter à Mercure, avec vn quadrin aspect de Mars à Mercure, & la teste du dragon sera avec vne conionction du Soleil à Iupiter, l'annee sera pacifique sans eclipse, & non du tout, & sera

le commencement comprenant se de ce que durera & commençant icelle annee sera faicte plus grande persecution à l'eglise Chrestienne que n'a esté faicte en Affrique, & durera ceste icy iusques l'an mil sept cens nonante deux que lon cuydera estre vne renouation de siecle: apres commandera le peuple Romain de se redresser & deschasser quelques obscures tenebres receuant quelque peu de leur pristine clarté non sans grande diuision & continuelz changemens. Venise en apres en grande force, & puissance leuera ses aydes si treshault ne distant gueres aux forces de l'antique Rome, & en iceluy temps grandes voyles Bisantines associees aux ligustiques par l'appuy & puissance Aquilonaire donnera quelque empeschement que des deux Cretenses ne leur sera la Foy tenue. Les arcz edifiez par les antiques Marciaux s'accompagneront aux vndes de Neptune, en l'Adriatique sera faicte discorde grande, ce que sera vny sera separé approchera de maison ce que parauant estoit & est grande cité comprenât le l'empotam la mesopotamie de l'Europe à quarante cinq, & autres de quarante vng, quarantedeux, & trente sept, & dans iceluy temps & en icelles contrees la puissance infernalle mettra à l'encontre de l'Eglise de Iesus Christ la puissance des aduersaires de sa loy, qui sera le second Antechrist, lequel persecutera icelle eglise & son vray vicairre par moyen de la puissance des Roystemporelz,

relz , qui seront par leur ignorance seduitz par
 langues qui trancheront plus que nul glaiue en-
 tre les mains de l'insensé: le suidit regne de l'an-
 techrist ne dureia que iusques au definement de
 ce nay pres de l'eage & de l'autre à la cité de
 Placus acompagnez de l'esleu de Modone Ful-
 oy par Ferrare maintenu par liguriens Adria-
 ticques & de la proximité de la grande Trina-
 crië. Puis passera le mont Iouis. Le Galique og-
 mium acompagné de si grand nombre que de
 bien loing l'Empire de la grand loy sera pre-
 senté & par lors & quelque temps apres sera
 espanché profuseement le sang des Innocens
 par les nocens vng peu eslevez, alors par grâds
 deluges la memoire des choses contenues de
 telz instrumens receura innumerable perte mes-
 mes les lettres: qui sera deuers les Aquilonaires
 par la volonté diuine & entre vne foys lyé sa-
 tan. Et sera faicte Paix vniuerselle entre les
 humains, & sera deliuree l'eglise de Iesus Christ
 de toute tribulation, combien que par les Azoa-
 rains voudroit mesler dedans le miel du fiel, &
 leur pestifere seduction , & cela sera proche
 du septiesme millenaire que plus le sanctuai-
 re de Iesus Christ , ne sera conculqué par les
 infideles qui viendront de l'Aquilon , le mon-
 de aprochant de quelque grande conflagration,
 combien que par mes supputations en mes pro-
 pheties le cours du temps aille beaucoup plus
 loing. Dedans l'Epistre que les ans passez ay

desliee à mon fils Cæsar Nostradamus , i'ay assez appertement declaré aucuns poinçts sans presage. Mais icy, ô Sire, sont comprins plusieurs grands & merueilleux aduenemens , que ceux qui viendront apres le verront , & durant icelle supputation Astrologicque conferee aux sacrees lettres la persecution des gens Ecclesiastiques prendra son origine par la puissance des Rois Aquilonaires vnis auecques les Orientaux , & celle persecution durera vnze ans quelque peu moins , que par lors defaillira le principal Roy Aquilonaire, lesquels ans accomplis suruiendra son vny Meridional, qui persecutera encore plus fort par l'espace de trois ans les gens d'eglise, par la seduction apostatiquè d'vn qui tiendra toute puissance absolue à l'eglise militante, & le saint peuple de Dieu obseruateur de sa loy , & tout ordre de religion sera grandement persecuté & affligé, tellement que le sang des vrais ecclesiastiques nagera par tout, & vn des horribles Rois temporels, par ses adherans luy seront donnees telles loüanges, qu'il aura plus respandu de sang humain des innocens ecclesiastiques, que nul ne scauroit auoir du vin, & iceluy Roy commettra de forfaités enuers l'eglise incroyables, coulera le sang humain par les rues publiques & temples, comme l'eau par pluye impetueuse, & rougiront de sang les plus prochains fleuves, & par autte guerre naualle rougira la mer, que le rapport d'vn Roy à l'autre luy sera dit : *Bellis rubuit*

rubuit navalibus equor. Puis dans la mesme annee & les suyuanes s'en enfuyura la plus horrible pestilence, & la plus merueilleuse par la famine precedente, & si grandes tribulations que iamais soit aduenue telle depuis la premiere fondation de l'Eglise Chrestienne, & par toutes les regions Latines. Demeurant par les vestiges en aucunes contrees des Espagnes. Par lors le tiers Roy Aquilonaire entendant la plaincte du peuple de son principal tiltre, dressera si grande armee, & passera par les destroits de ses derniers auites & bisayeux qui remettra la plus part en son estat, & le grand vicaire de la cappe sera remis en son pristin estat, mais desolé & puis du tout abandonné, & tournera estre *Sanctus sanctorum*, destruiete par paganisme, & le vieux & nouveau testament seront dechassez, bruslez, en apres l'antechrist sera le prince infernal, encores par la derniere foy trembleront tous les Royaumes de la Chrestienté, & aussi des infidelles par l'espace de vingt cinq ans, & feront plus grieues guerres & batailles, & seront villes, citez, chasteaux, & tous autres edifices bruslez, desolez, destruits, avec grande effusion de sang vestal, mariees, & vesues violees, enfans de laict contre les murs des villes allidez, & brisez, & tant de maux se commettront par le moyen de Satan prince infernal, que presque le monde vniuersel se trouuera defaiet & desolé, & auant iceux aduenemens, aucuns oyseaux insolites


crieront par l'air. Huy, huy, & feront apres quelque temps esuanouys, & apres que tel temps aura duré longuement sera presque renouvelé vng autre rogne de Saturne, & siecle d'or, Dieu le createur dira entendant l'affliction de son peuple, Satan sera mis & lyé dans l'abisme du barathre dans la profonde fosse, & adonques commencera entre Dieu & les hommes vne paix vniuerselle & demeurera lyé enuiron l'espace de mille ans, & tournera en sa plus grande force, la puissance ecclesiastique, & puis torne deslié. Que toutes ces figures sont iustement adaptees par les diuines lettres aux choses celestes, visibles c'est assauoir par Saturne Iupiter & Mars. & les autres conioinct comme plus à plain par aucuns quadrins lon pourra veoir. l'eusse calculé plus profondement & adapté les vngs avecques les autres. Mais voyant, ô Sereniss. Roy que quelcuns de la censure trouueront difficile qui sera cause de retirer ma plume à mon repos nocturne, *Multa etiam ô rex omnium potentissime præclara & sanè in breui ventura, sed omnia in hac tua epistola innectere non possumus, nec volumus, sed ad intelligenda quædam facta, horrida fata, pauca libanda sunt, quamuis tanta sit in omnes tua amplitudo & humanitas homines deosque pietas, vt solus amplissimo & Christianissimo regis nomine, & ad quem summa totius religionis auctoritas deferatur dignus esse videare.* Mais tant seulement ie vous re-
ouiers

23

quiers, ô Roy tresclement par icelle vostre singuliere & prudente humanité d'entendre plus tost le desir de mon courage, & le souverain estude que j'ay de obeyr à vostre serenissime Magesté, depuis que mes yeulx furent si proches de vostre splendeur solaire, que la grandeur de mon labeur ne attainct ne requiert. De Salon ce xxvij. de Iuing, Mil cinq cens cinquante huit.

Faciebat Michaël Nostradamus
Salonæ Petreæ
Prouinciæ.

Hazte con el libro que adelanta la historia.
CAESAREM DE NOSTRADAMUS



www.caesaremnostradamus.com

© Manuel Sánchez, 2007

[Email:info@caesaremnostradamus.com](mailto:info@caesaremnostradamus.com)

Reservados todos los derechos. **Copyright**

Esta publicación es solo para uso privado. Únicamente se podrá acceder a esta copia con previo permiso del autor. Queda terminantemente prohibida cualquier copia total o parcial de esta obra.

Con esta excepción, ninguna parte de esta publicación puede ser reproducida o transmitida en cualquier forma o por ninguno medio, electrónicos o mecánicos, incluso fotocopiada, sin permiso por escrito del autor.